

June 5, 2016

**Maikatlo a Domingo Kalpasan ti Pentekostes:
Ti Makawayawa a Bileg ti Espiritu**

Sapasap a Konsepto:

Ti Espiritu iyegna ti pannakaruk-at manipud kadagiti amin a klase ti namaterialan ken naespirituan a dadagsen.

Kangrunaan a Konsepto kadagiti nagduduma a benneg ti idad

N/K, YE: Wayawayaannatayo ti Espiritu Santo.

ME/OE: Ruk-atannatayo ti Espiritu Santo manipud kadagiti pakarigatantayo iti biag.

Youth: Ti Espiritu Santo ruk-atanna ti kumunidad manipud iti kinaignorante kinaawam hustisia.

Adult: Ti Espiritu iyegna ti pannakaruk-at dagiti kumunidad manipud kadagiti amin a klase ti namaterialan ken naespirituan a dadagsen a mangrabsot ti dignidad ken respeto iti bukod a bagi dagiti tattao.

Daan a Tulag: Exodo 5:1

Kalpasanna napan da Moises ken Aaron iti Ari ti Egipto ket kinunada kenkuana, “Palubosam dagiti tattao a mapan idiay let-ang tapno rambakanda ti fiesta a pangpadayaw kaniak.”

Baro a Tulag: Galacia 5:13

Iti biangyo kakabsat, naayaban kayo a mangwayawaya. Ngem saan a daytoy a wayawaya ti pakaigapuananyo a mangipalubos nga iturayannakayo ti tarigagayyo a kas tao.

PANNAKAILAWLAWAG TI TEKSTO

TARABAY KADAGITI MANGISURO

Ti trabaho ti Espiritu Santo ket maisupadi kadagiti amin a mangipaidam kadagiti tattao ti waywayada ken ti nawaya a panagpabilegda tapno magun-odanda ti kinaanany ti biag nga intuding ti Dios. Manipud pay idi un-unana, maip-ipiten dagiti tattao kadagiti agduduma a dadagsen a mangrabsot ti dignidad ken dayaw iti bukodda a kinatao. Saan nga aksidente wenno naituding a gasat ti kondision nga adda dagiti tattao a nawaya ket saan dagiti dadduma. Adda la ketdi puersa wenno bileg a mangidurduron ken mangimmameg kadakuada iti kasta a kasasaad.

Manipud pay iti itataud dagiti kagimungan iti panawen a nabingaybingay dagiti tattao segun ti panagsanikua, ti tarigagay a rumuk-at ket isun ti kangrunaan a mamagbalbaliw ti kagimungan. Ti panangkontrol kadagiti tattao ket maaramid a saan a mamadlaw ken babaen ti wagas a direkta ken sinasabrak. Sirib ti nalamuyot a wagas a panangkontrol babaen ti panangirakurak kadagiti ulbod ken kurang a kinapudno a mangaramid kadagiti banbanag a mangpuligos kadagiti estoria a nadesenio a mangipakaammo ken mangpasingked ti naballikog a kinapudno. Daytoy ti delikado a pamuspusan tapno maisugurado ti pannakontrol ti panunot.

Ti sabali pay a wagas ti panangkontrol ket ti direkta ken kinadamsak.

Maipatungpal daytoy babaen kadagiti sistema ken istruktura. Babaen iti daytoy a pamuspusan, adu a bilang dagiti umili ti sistematiko a maiwalin, magundawayan ken maimamameg tapno nawaya a maaramid dagiti sumagmamano a tattao ti mangkontrol ti ekonomia ken politika ti kagimungan. Daytoy a kita ti nadawel a langenlangen ket masustenar babaen ti pangta, panangbutbuteng ken kinadamsak. Kinapudnuna, daytoy kangrunaan a puon ken gapu ti amin a riri ken gubat.

Ti relihion ket mabalin met a maysa kita ti pannakakautibo. Uray dagiti mailupitlupit ket mabalin a masursuroda nga awaten ti pannakaidadanesda. Agsardengda iti tarigagayda a rumuk-at gapu ti panangibiagda ti pammatida. Kadagiti agballigi babaen ti panangundawayda kadagiti padada a tao, ti konseniada ket pinangudel ti ballikog a pannakaawatda iti ebanghelio. Gapu iti pammati maibilang a gagangay laeng ti kaawan ti hustisia ken saan a panagpapada gaputa amin dagitoy ket bunga ti idolohia saan ketdi a bunga ti Espiritu, ti kastoy a panirigan ket maysa met a porma ti naespirituan a pannakabalud.

Ti Espiritu ket wayawaya. Ti Espiritu ket kinapudno. Ti Espiritu ket hustisia ti Dios nga agwarwaras kadagiti amin a tattao, iti tengnga ti kagimungan ken iti sapsap a nakaparsuaan.